

# Friûl di Jevât

PAR CURE DA LA SOCIETÂT FILOLOGJICHE FURLANE

Vie Bellini, 3, Guriza - tel./fax 0481533849 - gorizia@filologicafriulana.it - www.filologicafriulana.it

## De Antoni, pastôr jenfri da la int

Al è nassût al cîl ai 22 di Març sul cricâ dal di Bonsignôr Dino De Antoni, arcivescul emerit di Gurize. Nassût a Cjoze ai 12 di Lui dal 1936, ultin di dodis fradis intune famee di pescjadôrs, al jere stât fat predi ai 23 di Otubar dal 1960, laureantsi in Dirit canonic ae Pontificie Universitât Lateranense. Tanç i incarics esercitâts: da canonic penitenziari a promotôr di Justizie dal Tribunâl eclesiastic diocesan e regionâl Trivenit; arcipredi da la Catedrâl di Cjoze e dal 1988 vicjari gjenerâl.

Ai 2 di Jugn dal 1999 al ven clamât a sotentrâ a Antonio Vitale Bommarco come arcivescul di Gurize e ai 26 di Setembar al fâs culî il so ingrès, vuidant la comunitât fin ai 28 di Jugn dal 2012 fasintsi ben volê par la sô capacitât di jessi un pastôr jenfri da la int. Deventât emerit, al sielç di restâ a vivi a Gurize e propit ta la Catedrâl inte cripte dai vescui, dongje di chei stâts prin di lui, al è stât soterrât seont la sô volontât.

I funerai a son stâts celebrâts lunis ai 25 di Març a Gurize te glesie dal Sacri Cûr, incolme di int. La Sante Messe, direte dal arcivescul Redaelli, e à viodude la partecipazion di vescui di dut il Trivenit, e no dome, dai seminarisçj di Castellerio e da la capele metropolitana dal Domo di Gurize, direzude dal mestri Fulvio Madotto: cjants da la tradizion furlane, slovene e taliane a àn compagnât tal ultin viaç une figure une vore ben volude da la diocesi.

O intindin ricuardâlu pe sô sensibilitât par dutis lis lenghis di cheste nestre Arcidiocesi: une atenzion a lis lenghis dal teritori tant che espression di fede e di identitât lenghistiche e culturâl. La Filologjiche lu à iniment cun plasê e ringraziamenti par vè volude la pagjine Friûl di Jevât su "Voce Isontina": o ricuardin ancjemò la braûre che Bons. De Antoni al veve disint a ducj - soreddut a chei di Udin - che ancje il setemanâl de sô diocesi al veve la pagjine par furlan. Une pagjine che e va inmò indenant e di cumò indenant e varà un altri amî in Cîl. Inmò graciis Bonsignôr! Cun gjò, Don Dino!

## Lis ativitâts da la Societât Filologjiche Furlane a van indevant fin ai 11 di Avrîl



**D**omenie Gurize e ospitarà la *Fieste de Patrie dal Friûl*, une fieste par promovi la identitât furlane, in ricuart da la bole che tal 1077 e ricognossè la autonomie dal Stât patriarcjâl furlan. Une sielte che e fâs stât suntun aspjet fundamentâl da la origjin di Gurize, o sei il fat che il destinatari, o miôr un dai doi destinatari, da lis donazions disponudis di Oton tierç cul diplome dai 28 di Avrîl dal 1001 al fo il Patriarcje di Aquilee. Gurize e jentre duncje ta la storie in diret rapuart cu la istituzion religjose - che si consinti il tiermin - mari dal Friûl: il Patriarcjât aquileiês.

A son propit i rapuarts tra Gurize e il Patriarcjât ancje dopo dal 1420, an che il Stât Patriarcjâl al pierd lis sôs funzions temporâls e al reste sicu istituzion religjose, che a costituissin il prin e inecuvocabil segn da la identitât di viodudis no dome religiosis tra Gurize e il Friûl centrâl: doi svilups in part diviers dal pont di viste storic, ma leâts midiant di cheste istituzion politiche e religjose superior a divisions politichis e nazionâls. E propit par chest al è just e al va ben che ta la citât su la rive dal Lusinç si fasedi cheste fieste: par rimarcâ che la identitât furlane e je une des componentis fundamentâls da lis sôs identitâts plurâls, dut une cun chê slovene e, fin a cent agns indaûr, cun chê todescje. Une identitât pardabon europeane.

La Societât Filologjiche Furlane, che propit a Gurize e je nassude cent agns

## Gurize in prin plan par la Fieste de Patrie dal Friûl

indaûr, e à volût fâ rispiet a cheste identitât plurâl vierzint lis manifestazions cu la prezentazion de *Cjarte Toponomastiche dal teritori dal Comun di Gurize* in trê lenghis: talian, furlan e sloven. Un lavôr che al è stât pardabon preseât e che al à viodût une grande partecipazion di int, vinars ai 22 di Març ta la sale dal Centri Civic di Lucinîs. Un altri biel apontament par valorizâ la lenghe furlane al è chel di lunis ai 8 di Avrîl. A lis 6 sot sere, li da la sale Dora Bassi, a vignaran presentâts i ultins doi volumuts da la golaine "Strumenti" de Filologjiche: *Rispiet in la marilenghe* di Gotart Mitri, che al propon cualchi resonament sul ûs dal furlan te nestre comunitât, par capî miôr la fuarce espressive de nestre lenghe e il sens de sô trasformazion; e *Ortografie furlane. Lenghe comune e varietâts locâls* di Paolo Roseano e Anna Madriz, une vuide che e presente lis regulis ortografichis dal furlan e che e jude a scrivi la marilenghe, ancje ta lis varietâts locâls. A la prezentazion a saran presints i doi autôrs, Mitri e Madriz, moderâts dal professôr

Rienzo Pellegrini.

Ma grande atenzion la Filologjiche e à volût puartâ ancje al mont da la scuele. Ve che alore, il *Docuscuele* - Centri pe documentazion, ricercje e sperimentazion pe scuele furlane al à inmaneât **GO GÔ GO**: trê seminaris formatif ta lis scuclis dal Friûl di Soreli Jevât, ogni joibe da lis 17.00 a lis 19.00. Il prin a si è davuelt li dal I.C. Gurize 1 ai 28 di Març, cuntune *lectio magistralis* dal professôr Franco Fabbro de Unversitât dal Friûl sul  **cerviel plurilengâl**. Si larà indenant ai 4 di Avrîl li dal I.C. di Cormons cul ilustradôr Luigino Peressini che al tabaiarà di **lecture dal teritori**, un viaç sul nestri teritori cu la ricercje da lis tradizions, il dissen e la scritture creative. Da ultin si rivarà al I.C. di Lucinîs ai 11 di Avrîl cu la dotore Ada Bier de Unversitât Ca' Foscari che e tabaiarà di **cemût doprà lis ICT** (*Information Communication Technology*) tal insegnament da lis lenghis. I seminaris a son vierts a ducj chei che a àn plasê di partecipâ e a son ricognossûts pe formazion dai insegnants daûr lis liniis vuide MIUR 2016-2019.

## Furlan in Rai

Cu la Vierte, doi gnûfs programs sul canâl televisîf e radiofonic regionâl

## La serie Int/Art e Lis predicjîs dal muini

**C**ul rivâ da la Vierte, il palinsest de Rai Fvg si è inricjît di doi gnûfs programs di cualitât in lenghe furlane. Sul canâl televisîf regionâl, di fat, e va in onde la tierce serie dal documentari *Int/Art*, fat di Agherose srl cul contribût de ARLeF; sul canâl radiofonic, invece, e cjate spazi la leture cotidiane di *Lis predicjîs dal muini* di pre Josef Marchet, par cure da la Societât Filologjiche Furlane. I filmâts di *Int/Art*, dal regist Dorino Miigutti, a esplorin il significât dal jessi artiscj zovins in lenghe minoritarie. Cheste tierce serie, dedicate ai protagonisçj de art performative, e presente Aida Talliente (regjiste e atore teatrâl), Federico Scridel (atôr), Martina Tavano (balarine e coreografe); Davide Perissutti (artist des arts dal circ) e Anna

Gubiani (dramaturghe). Tacadis cui 31 di Març, lis prossimis pontadis a laran in onde su Rai3 aes 10.30 di domenie ai 7, ai 14, ai 21 e ai 28 di Avrîl, cun repliche aes 22.05 su Rai3 bis (canâl 103) miercurs ai 10, ai 17, ai 24 di Avrîl e al prin Mai. Tacade cul prin di Avrîl, invece, e larà indevant fin al mê di Jugn la aventure radiofoniche di *Lis predicjîs dal muini*. Ogni dì, dal lunis al vinars, par sierâ la trasmission *Vuê o fevelin di...* des 15.15, l'atôr Fabiano Fantini al leiarà une *Predicje* gjavade fûr dal volum di pre Josef Marchet (1902-1966), leterât, studiôs, scritôr, ricercjadôr e docent dal prin cors di formazion par insegnants organizât intai agns '40 da la Filologjiche. Inte opare di Marchet, Vigji Scuete al è il muini imaginari da la ancjetant

imaginari vile di Gargagnà Disore che, par dibisugne, si cjate tal puest dal plevan e al intraten i siei paisans cun grande scletece e cuntun lengaç che dispès al beche. Cheste *predicjîs*, al scrîf Marchet, a son stadis racueltis e publicadis tant che testemoneance di vite furlane intun moment speciâl da la nestre storie - i prins agns dopo de vuere - e tant che esempi di lenghe furlane cence ancjemò misturis ni contaminazions. "Un classic de literature furlane dal secont Nûfcent - al declare Federico Vicario, President de Societât Filologjiche - un esempi par chei che si impegnin inte scritture in marilenghe; a rapresentin une dimension di valorizazion stant che il furlan al è, prime di dut, emozion e sintiment".

